

Hoera Voor Hart

Mi sa. Mi tambe ta kansá di tende e storia. E ta un storia bieu. Siertu politiko no a haña invitashon pa siertu evento ora la reina a bishitá Boneiru, i pesei nan a keda sin presentá. Un a tira falta riba otro. Un a akusá otro.

Anto gezaghèber Hart a hasi un deklarashon símpel ku a pone tur hende para ketu. Den un rueda di prensa, el a rekonosé ku el a hasi fout (òf sikiera el a tuma responsabilidat pa e fayó).

Hiep hiep hoera voor Hart!

Ningun hende ta gusta atmití nan fayó, eror, kibokashon, deskuido. En kontraste, nos ta preferá hasi tur klase di maniobra i kenshi verbal pa evitá di atmití nos frakaso. Nos ta gaña, nos ta desmintí, nos ta tira falta riba otro hende, nos ta akusá, nos ta zundra, nos ta kritiká, nos ta skonde, nos ta hasi kiko ku ta... morto spantá ku hende lo haña sa ku ta nos ku a frakasá.

Esaki ta un tendensia ku tur di nos tin desde tempu ku piká a drenta mundu. Ora Dios a kuestioná Adam tokante su piká, na lugá di tuma responsabilidat, Adam a tira falta riba Eva. I Eva na su turno a hasi meskos. Na lugá di atmití na Dios ku e ta kulpabel, el a akusá e kolebra

Pakiko nos tin tan asko di atmití nos kulpabilidat? Un motibu ta pasobra nos ke sa ku hende lo pensa i papia malu di nos pa motibu di nos fayó. Nos tin idea ku un atmishon di frakaso lo hasi daño permanente na nos reputashon.

Ma esei a pasa ku gezaghèber Hart ora el a tuma responsabilidat pa e fayó? Bo a tende komentarionan, “Gezaghèber no ta sirbi”? òf “Senor Hart a dañá su nòmber komo gezaghèber”? Nò! En kontraste, **nos ta apresíá i respetá nos gezaghèber mas nètamente PASOBRA el a tuma responsabilidat pa e fayó.**

Beibel ta konfirmá esaki. “*Pasobra ken ku halsa su mes lo wordu umiyá, i esun ku umiyá su mes lo wòrdu halsá*” (Lukas 14:11; 18:14). “*...Dios ta resistí e orguyosonan, ma ta duna grasia na e umildenan. Umiyá boso mes anto bou di e man poderoso di Dios, pa E por halsa boso na e tempu apropiá*” (1 Pedro 5:5-6).

Nos ta preferá sigui nos mes opinion na lugá di loke Dios a primintí den Beibel. Konvensé ku un atmishon di kulpabilidat lo perhudiká nos severamente, nos orguyo i kapricho ta prevení nos di atmití nos fayonan na lugá di umiyá nos mes.

Mi eksperensia ta komprobá loke Beibel ta bisa. Mil i un biaha mi a frakasá, kiboká, lubidá, i ofendé hende. Mil i un biaha mi mester a atmití ku mi ta robes i pidi despensa. Mi no a pèrdè nada dor di tuma responsabilidat pa mi palabranan òf akshon. Al kontrario, mi ta ripará ku hende ta apresíá onestidat. Mi nunca a nota ku un òf otro persona a respetámi ménos, a menospresíámi, òf ku mi a dañá mi nòmber pasobra mi a atmití mi fayó. **Nunka!**

Onestidat, tumamentu di responsabilidat, atmishon di kulpabilidat ta un birtut demasiado skars awendia. Difisilmente por haña esaki den politiko òf pion, dosente òf dokter, komersiante òf kliente. Tur ta bula pipa di un òf otro manera. Pesei ta asina refreskante ku Gezaghèber Hart tabatin e kurashi pa tuma responsabilidat pa e deskuido.

Gezaghèber ta hende méskos ku nos. Hende ta imperfekto! Nos tur—sin eksepsion—por (i ta) hasi fout. Nos tur ta kiboká, lubidá, kometé eror, i asta hasi piká. **Kuantu problema nos por evitá i solushoná si nos tur a atmití ora nos frakasá!** Dios ta bisa, “*Esun ku skonde su pikánan lo no prosperá, ma esun ku konfesá i laga nan lo hana misericordia*” (Proverbionan 28:13).

Senor Hart a hasi korekto! Pesei nos no por keda sin remarká riba esaki i **deseá ku mas hende lo sigui ehèmpel di nos gezaghèber.** Pesei nos no por keda sin bisa “hiep hiep hoera voor Hart!”